

Angallatit nunatsinni talittarfinnut talinnerini avalattussanngornerinilu ilanngaaserisut misissuinerat pillugu nukittorsaasoqassappat pisariaqartitsineq, periarfissat piunasaqaatillu pillugit Naalakkersuisut nalunaarusioqqullugit kingusinnerpaamik UPA2018-imi saqqummiussassamik peqquneqarnissaannik Inatsisartut aalajangiiffigisassaattut siunnersuut
(Siumup ilaasortai)

Akissuteqaat

(Aningaasaqarnermut Akileraartarnermullu Naalakkersuisoq)

Siullermeerneqarnera

Siumup ilaasortaasa Inatsisartut aalajangiiffigisassaattut siunnersuuteqarpoq, angallatit nunatsinni talittarfinnut talinnerini avalattussanngornerinilu ilanngaaserisut misissuinerat pillugu nukittorsaasoqassappat pisariaqartitsineq, periarfissat piunasaqaatillu pillugit Naalakkersuisut nalunaarusioqquneqarnissaannik. Piffissami kingullermi ilanngaaserisut suliaallu pillugit eqqartuinnermut siunnersuut pissusissamisoortumik ilassutaavoq, tamanna takuneqarsinnaavoq § 37 naapertorlugu apeqqutini 2017-imeersuni normu 49, 51, 71 aamma 95-imi.

Ikiaroorartut sunniutaannik inuiaqatigiinni kalaallini inuttut aningaasaqarnikkullu annertuumik ajornartorsiortitsilersarneri siunnersuummi unnersuussutigai. Tunngavilersuutit taakku arlaannaataluunniit isumaqatiginngissinnaanngilai. Naalakkersuisut isumaqatigilluinnarpaat, hashimik atornerluinerujussuaq inuttut aningaasaqarnikkullu annertuumik ajornartorsiortitsilersartoq.

Maanna naqissuseriissavara: Ikiaroorartut Naalakkersuisut akuersaanngilluinnarmatigik. Naalakkersuisulli siunnersuutit immikkut nalunaarusiortoqarnissaa pisariaqarsorinngilaat, tassami ukiuni kingullerni nalunaarusianik, paasissutissiinernik oqallinnernillu assingusunik peqareemat.

Nassuerutigineqassaaq, ajornartorsiutit tamakku ilanngaaserisoqarfikkut taamaallaat aaqinneqarsinnaanngimmata. Hashi akiorniarlugu nuna tamakkerlugu iliuusissatut pilersaarummi 2016-imeersumi ajornartorsiuteqarfiit akornanni suliniartoqarpoq, tassanilu ilanngaaserisoqarfik pillugu immikkut immikkoortortaqarpoq. Iliuusissatut pilersaarummi ilaatigut peqqinnissaqarfimmi, ilinniarfeqarfimmi, inatsisinik atuutsitsinnermut tunngassuteqartuni oqaatigineqareersutullu ilanngaaserisoqarfimmi suliniutit arlallit, taakkunani umiarsualiviit mittarfiillu isiginiarneqarlutik nassuiarneqarput.

Naalackersuisut isumaqarput, suliniutinik nutaanik aallartitseqqinnginnermi suliniutit aallartinneqareersut sunniuteqarteqqaarnissai periarfissinneqartariaqartut. Mittarfinni misissuisarnerup annertusineranik, kiisalu Kangerlussuarmi timimik akimut isigisinnaasumik (bodyscanner) pisisoqaqqammerneranik, ilanngaaserisut angalanerulernerinik ilaalu ilanngullugit, suliniutit kingulliit sunniutai suli kisitsisitigut sanilliutissallugit uuttorneqarsinnaasimangillat. Maannakkulli hashimik arsaarinninnerit amerleriarsimanageri malugineqarsinnaalereersimavoq. Matuma saniatigut Akileraartarnermut Aqutsisoqarfik atortunik allanik, ikiaroorartut katitigaanerannik ilisarinnissinnaasunik, Sikuki Nuuk Harbour-imi ilanngaaserinnermi atorineqartussatut eqqarsaatigineqartumik pisissalluni eqqarsaatersuuteqarpoq.

Sammissaq assingusoo UKA2016-imi immikkoortoq 81-itut aamma oqaluuserineqarpoq, taanna Aalborgimi aalajangersimasumik ilanngaaserisoqarnissaanik pilersitsinissamut tunngavoq. Taamani siunnersuutaasup itigartinneqarneranut pingaarnertut tunngaviusimavoq, sumiiffimmi aalajangersimasumi ataasiinnarmi misissuinerusalernerup sumiiffinnilu allani assinganik misissuinerusalertoqartinnagu eqqussuinerimik ajornartorsiutit sumiiffimmut allamut nuunneqaannarnissaat, taamaasilluni eqqussuinerup annikillisinneranik angusaqartoqarani. Tamatuma naqissuserpaa, misissuinerit annertusinerinnaanit hashi akiorniarlugu suliniutit siammasinnerusut aallartisarneqarnissaat pisariaqartinneqartoq.

Naalackersuisut isumaqarput nutaamik, ataatsimut isiginninnermut isummertuunngitsumik immikkut nalunaarusiortoqarnissaa pisariaqanngitsoq. Ilangaaserisullu pingaarnertut suliaat, tassa ilanngaaserisarnermi nakkutiginninnerit ukkatarineqarnerusariaqarlutik.

Qulaani allassimasut tunngavigalugit allannguutissatut siunnersuut tulliuuttoq Naalackersuisut saqqummiutissavaat .

**Hashi akiorniarlugu nuna tamakkerlugu iliuusissatut pilersaarutip
atuutilersinnissaanut sulinnermut atatillugu haship ikiaroorartullu allat umiarsuarnik,
Kalaallit Nunaannut talittunik eqqussorneqarneri pillugit ajornartorsiutit immikkut
iliuuseqarfiginissaat pillugu Naalackersuisut peqquneqarnissaannik Inatsisartut
aalajangiiffigisassaattut siunnersuut.**

Naalackersuisut naatsorsuutigaa, suliniutini taamaattuni angallatit assigiinngitsut tamarmik ilaatinneqarsinnaasut, matuma ataani ilaatigut, kilisaatit, umiarsuit tigerlaataannallit, umiatsiaaqqat allallu.